

Iskustvo i znanje sa Apeirona na Ekonomskom fakultetu u Zagrebu

## **NAŠ DEKAN ODRŽAO PREDAVANJE ZAGREBAČKIM STUDENTIMA**

Dekan Fakulteta poslovne ekonomije, prof.dr Sanel Jakupović 10. aprila bio je gostujući predavač na Ekonomskom fakultetu Sveučilišta u Zagrebu, na poziv profesora katedre za ekonomiku preduzeća ovog fakulteta.

Profesor Jakupović je održao predavanje iz kolegija Mikroekonomija za studente prve godine studija Ekonomskog fakulteta u Zagrebu.

Saradnja ova dva fakulteta uspostavljena je 2011. godine, kada su profesori sa Ekonomskog fakulteta iz Zagreba bili učesnici Prve međunarodne konferencije o ekonomskom razvoju i životnom standardu EDASOL, koju je organizovao Fakultet poslovne ekonomije Univerziteta "Apeiron".

- Ovo je bila prilika da se razmijene iskustva između nastavnika i studenata dva fakulteta, gdje smo utvrdili da postojanje zajedničkog sadržaja-kurikuluma predmeta Mikroekonomija na naša dva fakulteta predstavlja izuzetno kvalitetan okvir za mobilnost studenata, ali i samih nastavnika u međunarodnoj razmjeni. Potrebno je da se stalno i iznova usklađuju nastavni planovi i programi između studijskih programa koji su predmet razmjene i mobilnosti, naglasila je doc.dr.Martina Sopta, profesorica na katedri za ekonomiku poduzeća Ekonomskog fakulteta u Zagrebu.

Dekan Jakupović kazao je da je od 2011. godine u naučnom i istraživačkom radu saradnja dva fakulteta vremenom dobijala nove, veće dimenzije.

- Od ove godine prvi put uspostavljen je i most u području razmjene nastavnika u formi gostujućih predavača, što je izuzetna potvrda istrajnosti Univerziteta "Apeiron" u ispunjavanju standarda kvaliteta u visokom obrazovanju, u dijelu koji se odnosi na međunarodnu razmjenu nastavnog osoblja i njihovog učešća u nastavnom procesu na inostranim univerzitetima, dodao je dekan

Profesori dva fakulteta su dogovorili nastavak saradnje u tekućim aktivnostima naučno-istraživačkog rada, učešća u međunarodnim konferencijama i zajedničkim projektima, kao i razmjeni nastavnog osoblja.

Ekonomski fakultet u Zagrebu osnovan je 1920. godine i predstavlja najstariju instituciju visokog obrazovanja u području ekonomije u ovom dijelu Evrope. Danas je vodeća i najveća institucija visokog obrazovanja za obrazovanje preduzetnika i menadžera u regiji i ima nastavno osoblje od 250 članova. Ovaj Fakultet je nosilac većeg broja naučnih i stručnih projekata, čiji je sadržaj povezan sa savremenim ekonomskim problemima u Republici Hrvatskoj. Takva orijentacija nastavnicima sa Panevropskog univerziteta omogućava ostvarenje vlastitih istraživačkih i savjetodavnih potencijala.

11. april 2018. godina

Služba za odnose sa javnošću